

ARTURIENTIIUM DECLINATIONE SUPINA PRO FACILITANDO PARTU, INUTILI

QVAM

ADSPIRANTE SUMMO NUMINE
CONSENTIENTE GRATIOSO MEDICORUM ORDINE
PRÆSIDE

NO. GEORGIO DANIEL
COSCHWITZ,

DOCT. ANATOM. CHIRURG. ET BOTAN. IN ALMA FRIDERI-
PROFESS. PUBL. ORDIN. ET POTENTISS. PORUSS REGIS IN COMITA-
MANSFELDENS. ET APUD PALATINOS HALENS. PHYSICO MERITIS-
SIMO ACAD. CÆSAR. LEOPOLD NAT. CUR. COLLEGA
LONGE DIGNISSIMO,

PATRONO AC PRÆCEPTORE SUO MAXIME COLENDO

PRO LICENTIA,

MOS IN ARTE SALUTARI HONORES, PRIVILEGIA
ET IMMUNITATES MORE MAJORUM OBTINENDI

Anno M D C C X X V. D.


Nov.

H. L. Q. C.

Publico Placidoque Eruditorum Examini exponet.

DAVID Gottvertrau BOERNER.

DREBACENSIS MISNICUS.



HALAE MAGDEBURGICAE,

Typis IO. CHRISTIANI HILLIGERI, Acad. Typogr.



DISSERTATIO MEDICA INAUGURALIS.

DE

PARTURIENTIUM RE-
CLINATIONE SUPINA, PRO
FACILITANDO PARTU INUTILI.

PROOEMIUM.



Quod mille modis moriamur Mortales, unico vero nascamur; tritum est inter mortales proverbium: Nec deest ipsi generalis veritas; mortem enim quod attinet, in omnes ac singulos notum est; ipsam mortem esse certissimam, modum autem moriendi incertum, huncque reservatum aliquod esse Divinæ Omniscientiæ, & voluntatis. Nascendi modum quod concernit, in genere quoque veritas illa viget, quod omnes ac singuli a fœminis in Utero gestemur, postque novem menses elapsos,

ex utero materno , sub consuetis motibus atque doloribus , ad partum spectantibus, in lucem edamur: ideoque nec reges aut Principes, nec tenuioris fortis personæ ullam hic fortunæ prærogativam agnoscant aut experiantur. Verum enim vero, etiamsi hæc ita se habeant, nemini tamen, qui mundanas calamitates , post tristissimum Proto-plastorum lapsum nobis restantes perspectas habet, incognitum esse potest , specialissimum nascendi modum haud semper eundem esse, sed miseras, & maxima commiseratione dignas foemellas sæpissime cum gravissimo sui periculo experiri, atque testari, negotium partus a regula naturali & ordinaria deflectere, situmque foetus extraordinarium & præternaturalem, partum ipsis laboriosum, difficillimum, imo lethalem efficere.

Naturæ enim ordo & leges volunt, ut in partu legitimo Caput foetus antecedit, totumque reliquum corpus sequatur, succedentibus secundinis: quot autem, quibusque modis hic ordo invertatur, illi optime sciunt, qui miseris in hoc statu positis foemellis manus auxiliatrices præbere coguntur; mox enim partus illegitimus adest, quod loco capitis pedes, aut alterutra manus, mox quod axillæ, dorsum, nates, aut venter, exitum quærant primum: vel quod plures simul partes ad exitus viam simul detrudantur, quæ sibi invicem totique foetui egressum difficiliorem aut impossibilem reddunt.

Hæc foemellarum parturientium calamitosa conditio Medicis, Chirurgis, & obstetricibus an-
sam

sam dedit meditandi, de variis modis, diversisque enchirifibus, foeminis in hoc statu opitulandi, atque negotium facilius reddendi : quapropter tot scripta loquuntur de variis modis foetum invertendi, eumque ad legitimum situm reducendi, sub quo maiore facilitate, minoreque parturientium periculo excludi possit.

Hoc intuitu & sub hac intentione aliquando etiam consilium suppeditatur, DE RECLINATIONE PARTURIENTIUM VERSUS CAPUT : ut inde foetus alium acquirat situm, faciliusque extrahi queat. In cuius consilii & remedii utilitatem penitus inquirere, praesente Themate inaugurali, animus est. Quod, ut assistente SUMMO PROPITIOQUE NUMINE, in emolumentum ægrarum, bene cedat, ab eodem NUMINE devotissimis votis precamur.

§. I.

UT Dissertationis titulo satisfiat, necessitas postulabit, ut primo explicemus mentem, quid per Parturientes, quid per Partum difficilem & facilitandum intelligamus. Prius quod attinget, notissimum quidem est in omnes, Parturientes foeminas dici illas, quæ absoluto graviditatis termino, doloribus ad partum spectantibus corripiuntur, & in immediato foetum maturum excludendi negotio constitutæ sunt, & in vernacula, titulo generali, Krenßende Weiber vocantur. Cum autem hoc sensu omnibus ac singulis foemellis in

hoc statu positis hoc nomen competat, nostra autem tractatio non generalis, sed magis specialis sit; ratio postulat, ut mentem declaremus nostram, quod hic loci non de omnibus ac singulis gravidis partui proximis nobis sermo sit, sed saltem de illis, quæ Partui difficili subiiciuntur, & quibus pro faciliore reddendo partu, remedium in titulo nominatum ex hypothesi accommodatum esse posset. Illæ enim mulierculæ, quæ facilem legitimūque experiuntur partum, tali facilitationis remedio haud indigent, unde sua sponte fluit, illas parturientes hic non in considerationem venire, sed solum has, quæ respectum habent ad præsens negotium, circa quod primario tota tractatio occupata existit.

§. II.

Per partum difficilem & facilitandum non intelligimus omnem partum, qui cum labore & dolore parturientis coniunctus existit; cum sane hoc sensu paucissimæ, imo fere nullæ reperiundæ essent foeminæ, quæ non ad classē difficulter parturientium referri deberent. Constitutio enim illa legis divinæ perpetua est, adeoque universalis, ut nullæ pene mulieres gravidæ ab illa eximantur; quæ post tristissimum Protoplastorum in Paradyso lapsum sancitum est, quod mulier in memoriam commissi erroris, & pœnæ temporalis loco, gravida facta, sub doloribus ac cruciatibus foetum eniti debeat: & quamvis aliquando unum alterumve exemplum in communi vita observare liceat, quod sine peculiari labore atque dolore, brevissimo temporis spatio foetus excludantur, hæc tamen exempla adeo
rara

rara sunt, ut vix ac ne vix quidem in contrarium quotidianæ observationis allegari mereantur. Quicumque enim superficietenus saltem partus negotium considerat, molemque excludendam qua foetus ordinarie gaudet, in comparatione angustiarum viarum, quas permeare debet, æqua animalance ponderat; is facillimo negotio deprehendet, exclusionem foetus, non nisi sub rarissimis, & individualibus plane circumstantiis facilem esse, & sine doloribus, magnaue difficultate absolvi posse, quippe quod solum in robustis, laxiusque clausis personis, aut foetu existente minore, contingere potest: ita ut iure meritoque cum Propheta Rege fateri cogamur; DEum nos protraxisse ex utero matris.

§. III.

Cum itaque hoc sensu atque intuitu partus difficilis non sumatur, sua sponte exinde fluit, comparativam esse hanc partus denominationem, illumque hic intelligi debere, qui ad legitimum & ordinarium comparatus, variis ex causis, magis difficilis, imo præternaturalis audit atque illegitimus. Quemadmodum vero legitimus, naturalis, & comparative facilis partus dicitur; quando respectu partium genitalium mulieris, nullum partui impedimentum datur; foetus quoque naturalem & ordinarium situm, quo capite prius, & facie versus intestinum rectum matris inclinata, exitum affectat, servat; & aquæ foetum in utero circumdantes simul quasi protruduntur, ut, etiamsi non semper simultaneum, tamen neque nimis tempestivum exitum fortiantur: ita ad illegitimum, præternaturalem

lem atque difficilem referimus partum, omnem illum, qui vel a præternaturali membrorum genitalium dispositione, vel a foetus illegitimo ac præternaturali situ, difficilis redditur ac impeditur: ita tamen, ut in præsentē nostra tractatione maximum habeamus respectum ad illum, quem situs præternaturalis & extraordinarius infantis causatur.

§. IV.

Quemadmodum ab illis, qui artem obstetricandi callent, eamque ab omni ævo descripserunt, unicus ille infantis situs pro naturali & legitimo declaratur, qui foetum capite inclinatum sistit, & sub quo infans statim post orificii uterini aperturam quadantennis factam, capitis vertice intra pubis ossa ingressus, occipite versus pubem jacens deprehenditur; (de quo obstetrices dicere solent, *das Kindt sey eingetreten, und stehe recht*) ita præternaturalis situs longe plura occurrunt exempla, pluresque situs species, ab obstetricibus deprehenduntur, partum in longum protrahentes, difficilemque, imo sæpissime summe periculosum reddentes. Sic enim noti sunt diversi illi situs, quando vel pede alterutro, vel utroque, vel simili modo manibus; vel pede manuque simul; vel natibus, vel ventre, vel dorso, manui obstetricis inquirenti se sistit: vel quando genibus infidens progreditur: vel quando apparente artuum alterutro funiculus simul umbilicalis protruditur: ne dicamus de specialissimo varioque situ capitis, aut brachiorum, sub modo dictis modis situs inversi simul concurrente; ubi v.g. caput infantis latera versus ossibus innominatis, vel resu-

re supinum offi pubis firmissime infixum hæret; vel brachio alterutro tenetur, ut facilem cum reliquis partibus egressum invenire nequeat. Omnes hos, & quicumque alii occurrere possunt præternaturales situs foetus, ad partum referimus difficilem & præternaturalem, qui per artem, quantum in ipsius positum est potestate, quovis modo est, facilitandus. Haud equidem nos latet; plures authorum partum, quo foetus utroque pede simul egressum affectat, magis naturalem ac faciliorem declarare, præ illo, qui capite contingit; verum, cum hic ultimus ad minimum sit quotidianus, & ordinarius, regulam quoque quotidianam sequimur, & cum plurimis illum etiam modum, licet de cetero facilior sit præ aliis, ad præternaturalium classem relatum relinquimus.

§. V.

Cum itaque tot tantæque difficultates sese offerant a situ præternaturali foetus utero inclusi, haud immerito & Medici & obstetrices ab omni tempore curam gesserunt sollicitam, quo pacto difficultati partus obviam irent, atque per restitutionem situs magis naturalis, exclusionem foetus redderent faciliorem; eoque ipso, si non semper infantem, ad minimum matrem salvarent. Duplex præcipue in hoc negotio auxilii genus proponi ac suaderi solet, ab illis, qui pro liberatione muliercularum miserarum aliquod afferre contendunt consilium: unum consistens, in foetus ipsius dextra per manum obstetricis, aut chirurgi, facta aut suscipienda inversione, quam vulgo vocant das Benden des Kindes:

de qua enchirefi plurimi persuasi sunt, quod per illam infans pro lubitu e situ præternaturali, in naturalem & ordinarium reduci possit: alterum est Matris parturientis reclinatio supina versus caput, quam vocant *das Stürzen*; de qua non minus sibi aliisque promittunt, fore, quod foetus situ heteroclito adveniens, hunc situm facile in meliorem mutet, & tunc faciliori modo egressum inveniat. De priori enchirefi auxiliique genere in præsentia agere animus non est, cum forsan commodior alio tempore de hoc negotio dicendi sese obtulerit occasio; unde potius ad alterum remedii propositi genus tendimus, circa illud indagaturi, unde originem ceperit: in quo consistat: an utilitatem, aut damnum præstare valeat.

§. VI.

Originem a quibus traxerit huius auxilii commendatio, si inquiramus, docemur, iam dudum illud præscriptum esse a vetustissimis Medicis; si quidem Hippocratis scripta legenda nobis offerunt huius consilii vestigia, quæ partim in Libro I. De Morbis Mulierum; qui *περὶ γυναικείων* inscribitur: partim Libro *περὶ Ἐγκυατατομῆς Ἐμβρύου*, vel De foetus in utero mortui exectione, reperiuntur. Neque a scopo dilapsuros nos esse putamus, si ipsa Divi senis verba hac de re proferamus. Loquitur Libr. De morbis Mulierum sequenti modo: *Utatur item concussionibus; sic autem concussionem facito: Lectum altum robustum ac instratum sumito, & mulierem supinam reclinato, pedus vero, & axillas ac manus, fasciis, aut molli lato toro ad lectum alligato, ac cingito, & crura,*

crura incurvato, & malleolis apprehensam detineto. Quum autem sic disposueris, sarmentorum mollium fascem aut aliquid huic simile parato, tantum quantus sufficit, ut lectum non negligat excipiendo ipsum, dum in terram proiicitur, quo non pedibus iuxta caput, terram contingat. Postea vero ipsam manibus lectum apprehendere iubeto, & lectam ad caput sublimem habere, ut declivis sit in pedes, animadversione habita, ne prona sit homo ipsa. Ubi vero hæc facta fuerint, & lectus sublimis fuerit, retro sarmenta supponito: maxime autem dirigit, quo pedes terram non contingant, dum lectus proiicitur & ut sint intra sarmenta. Elevent autem duo viri ex utroque pede hinc atque illinc, quo in directum lectus cadat. Concutiendum est autem maxime una cum partus dolore: & si exeant, statim quiescendum: sin minus, interstitio facto rursus concutito, & in lecto gestatam attollito ac agitato. & paulo post: Quicumque vero duplicati compliantur, & in osculo uterorum incumbunt, eos sive vivi fuerint, sive mortui, rursus retro protrusos vertere oportet, quo secundum naturam in caput exeant. Quum autem retrudere voles aut vertere, supinae foeminae reclinatae, molle quiddam sub coxas substernere oportet: & sub lecti pedes, quo altiores sint hi a pedibus, semper aliquid supponere. Sed & coxæ altiores capite sint, & ut nullum cervical sub capite sit, provideto. Quum vero retrusus fuerit foetus, & hinc atque illinc obvolvitur, ut secundum naturam constituatur, & quicquid sub coxas subdidisti, subtrahito. Capiti vero pulvinar subiicito. Libro autem De foetus in utero mortui exectione sequentem in modum sese declarat. Concutere autem hoc modo

oportet : super tenui linteo substrato Mulier reclinanda, alio superiniecto, quo eius pudendum obveletur, & utrumque crus tenui linteo circum tegendum; & utraque manus. Duæ autem mulieres utrumque crus apprehendant, & aliæ duæ utramque manum, deinde eam ipsam non minus quam decies valide concutiant. Postea vero mulier in lectum reclinetur, ita ut caput deorsum, crura autem sursum habeat, & mulieres omnes dimissis manibus crura apprehendant, eamque crebro in lecto concutiant facta in humeros reiectione, ut in ampliorem locum concussus foetus convertatur, & naturaliter prodire possit. Sic quoque Albertus Magnus Lib. De Mulierum morbis, dicit: Si autem foetus primo unico pede progredieretur, mater supine debet reclinari, pedibus sursum, capite vero deorsum, natibus probe elevatis. Et obstetrix manibus suis pedem blande retrudat: & Mater frequentius se vertat volvatque, donec infans caput ad exitum vertat.

§. VII.

Sequentibus temporibus priores sequuti sunt recentiores, unde David Herlicius in Tractatu de Gravidarum cura mentionem aliquam etiam facit huius enchiriseos: & Solingerus eandem partim in Chirurgia, partim in Embryulcia, distinctis vicibus suadet atque commendat. Nec defunt nostris temporibus Medici, qui in Praxi communi hoc remedii genus tanquam primi ordinis, & principaliter adhibendum ordinarie suadent & iubent, cum veteribus in hoc passu procul dubio eandem foventes rationem, ex qua tota inventio producta videtur. Putarunt enim veteres, Foetum sub hac re-
clina-

clinatione supina, & ab iis quoque adiuncta concussatione, a confiniis orificii uteri, ossiumque pubis, passivo modo, & gravitatis pondere, versus uteri fundum relapsurum esse, eoque ipso eo redigi posse, ut postmodum sub situ puerperæ erecto, facilius novum aliumque commodiorem subeat situm, sub quo faciliorem quoque & magis naturalem exitum aut egressam invenire, vel ad minimum manu obstetricis intra uterum inverti, queat: quam rationem probabiliter desumferunt a cavitate uteri expansi, eaque cum figura sacci alicuius comparata, putantes fieri posse, quod molis alicuius instar in sacco ex parte vacuo & laxo, foetus etiam in partu constitutus, hinc inde facile moveri possit; simul respicientes forsan ad varios motus, quibus ante partum foetus vitæ indicia gravidis præbere solet. Nolumus statim fundamenta rationis allatæ, quæ ex allegatis Hippocratis verbis sufficienter patet, perquirere, eorumque robur indagare; cum commodiore occasione & firmiore iudicio id fieri poterit; quando plura adhuc dicenda, hucque spectantia, præmissa sunt: quapropter potius ad descriptionem ipsius operationis hodiernum consuetæ progrediemur.

§. VIII.

Describimus autem ipsam operationem magis ex consuetudine recepta, quam ex præscripto; cum præter illa, quæ Hippocrates in superioribus satis operose atque confuse reliquit, parum de modo operationem administrandi, apud authores reperiatur, sed potius sola operatio tanquam iam nota

suadeatur & commendetur. Solent itaque ut plurimum foeminam parturientem in tellam collocare cum reclinaculo paulo altiore, eaque foeminam alligatam supine cum capite deorsum versus terram inclinare, coxis sursum elevatis, atque in hoc situ per notabile temporis intervallum detinere; aut per vices eandem operationem repetere. In hac operatione tamen alii ab aliis in tantum discrepant; ut gradum reclinacionis supinae moderentur, & eo contenti sint, quod situm paulo declivorem quam ordinarius est adornent, alii vero plenariam quasi resupinationem suscipiant. Volutatio enim illa, & iectigatio, quam Hippocrates verbis citatis indigitat, quantum scimus, vel plane non, vel ad minimum rarius, & forsan solum apud rusticæ gentis homines in usu est; cum apparatu suo crudelitatis notabilem speciem erga parturientes prodat, atque in sensus incurrere faciat. Unde circa modum administrationis naud amplius occupati, sicco nunc pede transimus ad illam huius operationis considerationem, qua possibilitas effectus, & utilitas aut inutilitas ipsius in hoc negotio, erit perpendenda: quo tanto melius formari deinde possit iudicium, an hoc consilii genus cum ratione & fructu ulterius miseris parturientibus sit suadendum & commendandum; an vero ex arte medico-chirurgica, Embryulciam respiciente, sit proscribendum.

§. IX.

Quod ut commode fiat, necesse est, ut conditionem uteri, tam ante partum, quam sub partu, perpendamus. Situm itaque habet Foetus in utero cum
fecun-

secundinis per totum gestationis & graviditatis tempus, quamdiu inclusus est tunicis, ipsum cum Liquore amnii involventibus, & quidem sufficienter liberum, ut motus, quamprimum vitam adeptus est, voluntarios, atque locales, notabiliter exercere possit; unde quoque mulieres gravidæ, a dimidio gestationis tempore ad finem ipsius, varios diversosque motus, mox pedibus calcitrando, mox brachiis extendendo, mox toto corpore hinc illinc movendo, perpetratos sentiunt, eosque aliquando adeo fortes, ut aliquid morboſi indicent, vel ad minimum satis molesti ipsis foemellis evadant. E quibus patet, uterum sub imprægnatione, succeſſu temporis non solum expandi, sed tantum etiam expansionis gradum acquirere, ut infanti satis liberum concedat spatium, & laxè satis illum ambiat, nec strictione quadam, arctè corpori infantili adplicetur. Hic uteri status procul dubio ansam dedit Medicis, ad inventionem supinæ reſclinationis; reputantibus, semper eundem uteri manere statum, sub ipso quoque partu, foetusque exclusione; quod, si ita eſſet, sane hanc operationem legitimare, eamque repetito commendare posset.

§. X.

Est autem Uteri conditio, sub ipso partus negotio, plane diversa ab illa: quemadmodum enim ante partum laxior uterus foetum tunicis inclusum amniique liquori innatantem ambit, ita, si laxitas illa uteri semper talis maneret, sane nunquam exclusio foetus, partusque absolveretur. Cum autem Foetus in uteri cavo hærens, sit corpus solidum, atque nunc e loco movendum; nec via exitus simplici-

citer

citer pateat, ut foetus passivo motu, aut ponderis nisu, extra uterum simpliciter elabi possit; sane necessitas postulat, ut pars continens talem obtineat dispositionem, qua contentum propellere, ipsamque egressus viam recludere possit. Utrumque fit fibrarum motricium uteri contractione, atque parietum uteri proximiorum ad foetum adplicatione: qua foetus cum reliquis pertinentiis propinquius ad orificium uteri adpellitur, sensimque intra pubis & reliqua ossa impellitur; & dum uterus ita a fundo orificium versus stringitur, eoque foetus, capite præcipue rotundo ad idem orificium adpellitur, sensim sensimque Uteri orificium aperitur, & sic egressus via paratur, quo foetus sub hoc motuum strictiorum apparatu, per viam apertam exire valeat. Hic uteri motus circa foetum strictior, efficit quoque ut tunicae cum liquore incluso proximius accedant, & tandem rumpantur; quo facto in partu legitimo & facili, caput infantis vel immediate, vel brevi post, exitus viam ingreditur, firmiterque intra ossa deprimitur. Quod si autem partus difficilis aut illegitimus fuerit, alia quædam corporis infantilis pars eandem viam quærit, eoque ipso, tangenti & inquirenti obstetrici in situ præternaturali se offert, ac simili modo firmiter intra ossa impingitur. Nec desinit sub motibus atque doloribus ad partum spectantibus hæc uteri strictura, donec foetus & secundinae excludantur, partusque absolvatur. Id quod optime ab experientia sciunt ipsæ obstetrices, & illi, qui manum obstetricantem mulierculis offerunt ex Medicis atque Chirurgis; quando sub intrusione digitorum, manuumve, intra
uterum,

uterum, tantam offendunt uterum inter & infantile corpus angustiam spatii, ut sæpissime digitos vix movere, aut manu officium suum pro intentione præstare valeant.

§. XII.

Cum itaque talis sit uteri status in & sub ipso partu, ut ille arctius ad corpus infantis adigatur, neque ipsius exclusio aliter, quam sub hac uteri constrictione absolvi possit; miramur sane quod Medici hanc operationem, in adeo angusto loci spatio impossibilem suadeant, ut foetus exinde alium, pro sui exclusione faciliore, situm acquirere debeat; ita ut dubii hæreamus, an non in illos iure cadere possit Solingeri iudicium, quod de Barbette, in puncto extractionis foetus mortui in genere, eiusque inversione in utero, declaravit; quando dicit: Barbette folget dem Aquapend: von Worte zu Worte, und redet sehr weitläufftig davon, wie das Kind mit einer Hand zu kehren sey: aber solches läset sich mit Todten Kindern so bequelm nicht thun; dann es gehet sehr schwehr damit her, es wäre dann, daß das Kind in einem ganz geräumen utero frey, und gar nicht darin gezwungen sey, und ist alßdann gleichwohl noch mühsam genug zu thun. Wo aber das Kind groß, von ordinairer Länge und Dicke, der Uterus auch in einander gezwungen ist, wie solches meistens geschiehet, so ist es unmöglich, daß man das Kind wenden kan, wie mich solches die Erfahrung gelehret hat. Hierauß erhellet denn, daß man von Barbette glauben muß, daß Er die Operation niemahlen unter Händen gehabt: Wie dann auch solche die wenigsten verrichtet, die doch viel Papier in deren Beschreibung verflecket haben. Aliter enim Uterus hic

non est considerandus, nisi ut faccus, circa corpus aliquod solidum firmiter ligatus, quem si centies circumvolveres, faccus quidem loco movebitur, sed corpus illi inclusum, propter spatii angustiam situm suum nequaquam mutabit. Simili quoque modo mulier quidem parturiens, & abdominis contenta reliqua libere quasi fluctuantia moventur, & reclinantur, uterus vero obfirmationem suam in pelvi habens, locum, longe minus foetus a doloribus partus ossibus pubis infixus, ullo modo situm, mutare potest.

§. XIII.

Sola hæc impossibilitas finem propositum obtinendi, sufficiens esse posset, pro dissuadenda parturientium reclamatione supina: verum necessitas, & negotii circa quod versamur dignitas, postulat, ut alias quoque rationes, tam a priori, quam a posteriori desumendas adducamus, ex quibus respective ipsius inutilitatem, & noxam demonstramus. Quod ut tanto melius fiat; considerandas esse censemur circumstantias cum tempore, quibus præsentibus hæc operatio suaderi solet: fit hoc ordinarie generaliter in partu difficili, qui talis declaratur ex situ foetus præternaturali, quando nempe foetus vel capite oblique ad ossa innominata appulsus, humero aut manu alterutra; vel duplicatus natibus, vel duplicato collo, & capite vel resupino, vel ad pectus prono, vel dorso, vel abdomine, exitum quærens, ab obstetrice deprehenditur; & spes inversionis qualiscunque foetus, per manum obstetricantem, evanuit; ruptis quoque tunicis foetum ambientibus, & aquis effusis. Quæ circumstantiæ omnes abundanter nos docent, tunc temporis a spasticis Uteri tractionibus, & sub doloribus

ribus partus, ingressum foetus intra ossa transitum ipsi concedentia, iam factum esse, foetumque ita infixum hærere, ut propter continuantes dolores, & uteria fundo orificium versus contractionem, impossibile sit foetum retropellere: siquidem sectiones foeminarum in tali partu defunctorum, repetitis vicibus nos docuerunt, vim illam motus impulsorii tantam esse, ut certe haud leve manuum robur requiratur, aperto abdomine & utero, foetus ut retrahatur, præsertim capite ita in angustias protrusus. Si vero ad modo dicta quis regerat; verum quidem esse, foetum semel ita infixum non posse per reclinacionem supinam retro pelli, situmque suum mutare, ast forsan melius hoc obtineri, si reclinatio supina tempestive magis susciperetur, & ipsi locus concedatur, tunicis foetum includentibus adhuc integris, stantibusque in illis adhuc aquis, & antequam motus spastici atque contractorii in utero invalescant. Verum ad hoc respondemus, quod sub his circumstantiis supina reclinatio æque intempestiva sit, quam sub antecedentibus: in illo enim casu contrariatur finis obtinendi impossibilitas; in hoc vero necessitatis & utilitatis defectus: quamdiu enim tunicæ adhuc integræ, & aquæ nondum effusæ sunt, tamdiu periculum illud cessat, quod reclinacionem suppositam postulare opinantur; ne dicam, quod obstetrix in tali statu de speciali embryonis situ, qui adminiculum tale postulare posset, nondum adeo certa esse queat: præter quod gravior adhuc subsit metus, quod in hoc rerum statu Embryo potius ad præternaturalem, quam ad naturalem disponderetur situm; quod probant plura gravidarum exempla, quæ a vectura & ventris facta

immodestiore motitatione aut succussatione aut lapsu, damnum illud experta sunt, ut ex situ foetus præternaturali vitæ periculum, partumque difficilem incurrerent. Tandem si etiam in se verum esset, foetum a reclinatione matris e situ illo præternaturali in Uteri cavum retrudi, atque relabi; quis quæso fidem interponere poterit suam; quod postmodum non forsan eundem situm teneat, aut adhuc peiorem & magis periculosum assumat; cum id unice a casu fortuito dependeat.

§. XIV.

A posteriori autem & ex historia facti pro certo habemus, partim adhibitam reclinationem supinam in similibus casibus plane nihil iuvasse, partim absque illa satis feliciter extractionem foetus, tam vivi quam mortui, perpetrata fuisse; partim denique, damna atque incommoda gravia illam secuta, imo noxas irreparabiles ab illa productas esse. Primum quod attinet, Ego Præses plus quam simplici vice adstiti foeminis, in auxilium vocatus, quæ reclinatae fuerant ante meum adventum, ex aliorum medicorum & muliercularum consilio; siquidem nuperrime saltem foeminæ tali adstiti, ubi foetus brachio dextro exitum quærebat, corpore transversim per abdomen extenso, capite in pectus prono, in dextro pelvis latere hærente: hic reclinatio binis vicibus, per horam repetita erat, nullatenus immutato foetus situ, neque ad latum digitum relabente foetu; quem tamen sub Divino auxilio manibus extraxi, salva atque superstita matre. Possem hæc pluribus ex propria experientia corroborare exemplis, si tempus id permitteret. Quod autem absque hac operatione feliciter

citer satis foetus extractio absolvi possit, id ante omnia testatur obstetrix Brandeb. suo exemplo, quod nusquam hac operatione in gravissimis licet casibus opus habuerit: & ipsemet salva conscientia testari possum, Me nunquam hoc remedii genus adhibuisse, cum tamen fonticos sub manibus habuissem casus; quorum aliquos in gratiæ divinæ assistentis laudem adducere possum. Vocabar ante aliquot abhinc annos ad Nautæ cuiusdam foeminam, ubi foetus axillis adveniebat; capite supra os pubis matris, in pectus prono: accersitus quoque erat alius Medicus, qui reclinationem supinam suadebat, quam tamen recusabam, insistebat alter dato consilio, & sub discessu audacter asseverabat, me frustra esse tentaturum omne auxilium, neglecto hoc consilio; verum divina effecit clementia, ut foetus, mortuus quidem, sine unco & ullo instrumento ferreo, sola manuum ope intra horæ spatium extraheretur, salva & superstite matre. Alia vice ante biennium ad militis uxorem vocatus, foetum capite oblique ad dextras protrusum, & axilla sinistra exitum affectantem deprehendebam: eumque sine reclinatione, trium horarum spatio, salvum vivumque parentibus tradidi, in hunc usque diem superstitem. Simili quoque modo ante septem aut quod excurrit hebdomadas, ad foeminam gente Hebræam vocatus, foetum nates ad exitum præbentem offendebar, quam foeminam imperita obstetrix per nyctimerum iamiam tractaverat frustra, nec genitalibus ipsius pepercerat, ut tumida, sanguineque influo livida adparerent; & præ multa parturientis fatigatione, dolores ad partum necessarii disparerent. Postquam ea, quæ pro excitandis

tandis de novo doloribus requirebantur, propinave-
ram, binarum horarum spatio, neglecta omni resu-
piratione, Deo sit laus, Puellam sanam vivamque
matri tradebam.

§. XV.

Possemus certe, si vellemus, plura adhuc in me-
dium proferre rerum testimonia abundantissime as-
sertum propositum confirmantia; cum vero ea, quæ
allata sunt, pro veritatis testimonio sufficere possint;
potius ad incommoda, & noxas, quæ ab hac reclina-
tione supina propullulare possunt, transimus. Pri-
mum incommodum, a quo nullæ liberæ esse possunt
fœminæ sub hac reclinatone, est respirationis diffi-
cultas, & suffocationis metus, cui subiiciuntur ab in-
testinorum & ventriculi versus diaphragma relapsu:
hoc enim contingente Diaphragma violenter versus
thoracem comprimitur, pulmonumque debita ex-
pansio sub aeris inspiratione gravissime impeditur;
quod tamen in partus labore maxime est molestum.
Alterum quod inde pullulat damnum, experiuntur
præ reliquis personæ plethoricæ; præter enim quod
sanguis decubitu suo ad caput facto, vasorum infar-
ctum, partiumque inflationem causetur, ex facili
gravissimos capitis dolores, ex restagnatione sangui-
nis oriundos post se relinquit. Ne dicam quod in iis-
dem subiectis gravissimum incutiat metum, de vaso-
rum sanguiferorū ruptura in pulmonib9, & hinc sub-
sequente hæmoptysi, & ad phthisin dispositione. Ne-
que ad symptomata foeminas tales leviter afficientia,
referendus est Vomitus, quo sub illa operatione ve-
xantur, præsertim si brevi ante tempore cibos, aut
potum pro lubitu assumerint: quale quid eveniebat
foemi-

foeminae illi, de qua primo statim loco diximus: vomebat enim tanto cum impetu sub ipsa reclamatione, ut post illam caput sanguine quasi inflatum esset & vomitus per totum parturiendi tempus continuaret.

§. XVI.

Neque nos latent exempla, quod post talem reclamationem supinam, colli inflatio quasi strumosa sequuta sit: sicuti enim hæc sub ordinario partus labore facili negotio ortum trahere potest sub eiulatibus, & aeris pressione, ita longe facilius hoc succedit in tali puerperarum statu, ubi libera respiratio ipsis denegatur, humorumque decubitus extraordinarius ad has partes invitatur. Gravissima denique noxa, & quidem irreparabilis, cum vitæ dispendio coniuncta, esse potest metuenda abhinc uteri ruptura aut crepatura. Quod si enim casu contingeret, ut foetus, modo sperato, versus uteri fundum relaberetur, atque hoc impetuose contingeret, aut foetus artubus extremis, præcipue inferioribus versus latera uteri expansus esset, nil sane facilius esse posset, quam quod vel a mole totius foetus relabentis, vel ab artu extremo firmiter ad uteri latus protenso, sub motu violentiore uterus disrumpatur, & misera talis parturiens derepente moriatur. Quod, ne quisquam pro rationis figmento habeat, ab Experientia, tristissima licet, facti historiam huc facientem allegare liceat; de Muliere paupercula, partus labori exposita, & ante decem circiter annos pari fato in suburbio extincta. Hæc ex situ Embryi præternaturali difficilem patiebatur partum, & ob fortis tenuioris conditionem obstetrici sese tradebat tenuioris experientiae: iadstantes mulierculæ, tanquam similis farinae personæ, inter alia etiam reclamationem supinam, post-

postquam foetus mortuus deprehenderetur, commendant non modo, sed suscipiunt, & quidem plus simplici vice: quo facto brevi post ad stantes sonum aliquem in ventre parturientis graviores audiunt, paucisque momentis Puerperam sub manibus extinctam vident. Mittebant mihi Præfidi nuntium, petentem, ut defunctam diffecarem, inque causam repentinæ mortis inquirerem: nec renuebam, sed quamprimum fieri poterat, apertionem suscipiebam: qua adornata, Uterus in sinistro latere disruptus apparebat, propendente intra abdomen infantis pede; capite vero prægrandi intra ossa pubis adeo infixum atque incarcerato, ut multo opus esset labore, quo extra hunc carcerem retrorsum traheretur,

§. XVII.

Hæc omnia, si probe ponderentur, tanti esse ponderis existimamus, ut non modo impossibilitas, sed inutilitas Reclinationis supinæ apud parturientes satis manifeste adpareat. Unde iuniores præcipue Medicos fideliter monemus, ut Praxin aggressuri a tali consilio atque remedio sibi temperent, neque in illud spem vanam reponant, sed potius obstetricibus aliquando iuncti, talia consilia proponant, quorum effectus minus infidus ac periculosus, sed certior meliorque deprehenditur. Nos in præsentī tractatione egimus id, quod officii, & negotii ratio postulavit. Sint summo atque æterno Numini laudes æternæ, pro singulari gratia, qua nostra in hoc genere tentamina bene voluit; faxit idem Numen, quo præsens quoque tractatio in sui Gloriam vergat, ægrarumque parturientium verum solamen ipsius sit & maneat

verus & unicus

F I N I S.